

PM: Malaysia sokong syor sidang damai Timur Tengah

BH 30 NOV 1983

KUALA LUMPUR, Jumaat — Datuk Seri Dr Mahathir Mohamad berkata, kerajaan dan rakyat negara ini menyokong penuh cadangan untuk mengadakan Persidangan Damai Antarabangsa Timur Tengah, yang membabitkan semua pihak, termasuk Pertubuhan Pembebasan Palestin (PLO) sebagai wakil mutlak rakyat Palestin.

Sehubungan itu, Perdana Menteri berkata, kerajaan dan rakyat Malaysia mengulangi ikrar mereka memberi sokongan berterusan ke-

pada perjuangan rakyat Palestin untuk keadilan dan hak di tanahair mereka.

"Di sebalik ketidakmampuan yang kelihatan di kalangan masyarakat antarabangsa bagi menyekat Israel daripada meneruskan tindakannya, adalah penting bagi kita menyokong satu usaha penyelesaian yang adil mengenai masalah Palestin.

"Usaha mencari penyelesaian yang adil itu mesti merangkumi hak mutlak rakyat Palestin untuk kebe-

basan tanahair mereka," katanya dalam perutusan sebagai memperingati Hari Perpaduan Antarabangsa Rakyat Palestin hari ini.

Datuk Seri Dr Mahathir berkata, hak mutlak rakyat Palestin terus dinafikan dan mereka masih ditindas di segi politik, sosial, ekonomi dan budaya.

Katanya, beberapa generasi telah membesar tanpa mengenal keamanan. Tragedi dan penderitaan rakyat Palestin mesti dijadikan perkara asas untuk perhatian semua rakyat yang cintakan keamanan, tidak kira di mana sahaja mereka berada.

Malah, tegasnya, masyarakat antarabangsa banyak kali mengisytiharkan kesanggupan mereka berdiri teguh di belakng perjuangan rakyat Palestin seperti digambarkan melalui banyak ketetapan Bangsa-Bangsa Bersatu serta forum antarabangsa lain.

Berdegil

"Bagaimanapun, Israel tetap tidak mengendahkan perisytiharan masyarakat antarabangsa itu serta berdegil untuk meninggalkan kezaliman dan dasar penaklukan mereka," katanya.

Sehubungan itu, Perdana Menteri menegaskan, kerajaan dan rakyat Malaysia sekali lagi menyertai masyarakat antarabangsa dalam memperingati hari ini sebagai Hari Perpaduan Rakyat Palestin.

"Ia masih menjadi satu usaha yang sukar bagi masyarakat antarabangsa dalam mencari keadilan bagi rakyat Palestin yang dihalau dari tanahair mereka serta dipaksa hidup sebagai pelarian," katanya.